

2 पत्र पत्र रासता रोंडो सिट्टि

इद सिट्टिता बारेमते गिचचो परिचयम

रासतोना पोरोल: पत्र

रासता कालम: इसवि सन 67

मोदाटा सिट्टि पत्र बोर्क अय्ते लोहचि मत्तोर, ओर्के मरा इद रोंडो सिट्टि रासतोर. मरा बारि रासतोर इत्ते, मुन्ने लोकलकुनहेंदाल विस्वासल्लुकुंक तकलिपकु वायुंदुं, गानि इंदके परिस्तिती अल्हा हिल्ले, बदलांचता. अगाटा विस्वासल्लुकुना लोप्पोने तप्पुड बोदा कराहनोर पुटसि सत्तेम पोल्लेक हरि हिलाकोंटा आसेके मत्ता.

अदुनहाटी विस्वासल्लुक तप्पुड पोल्लेने अर्काकोंटा सत्तेमते, विस्वासमते गट्टिगा मंदना आनि पेनदा पोल्ले मत्ताप ताकाना इंचि पत्र इद रोंडो सिट्टि रासतोर.

बगा बतल मंता

जोहार आनि परिचयम 1:1-2

विस्वासिना दर्सनम 1:3-21

तप्पुड बोदां कराहनोर 2:1-22

किरिस्तुना आकिरता वायमळ बारेमते 3:1-18

जोहार

1 नना सिमोन पत्रुन, येसु किरिस्तुना दासुन आनि प्रेरितुन आंदुन. बोर अय्ते मना पेन आनि मुक्ति हियना येसु किरिस्तुना सत्तेमताहेंदाल मावालेसीं विलुवाता विस्वासम दोर्किच्छुत्तुर, ओर्क इद सिट्टि रासेके मंतन.

2 पेन आनि मना सामि येसुना तेल्विहेंदाल मीकु कुर्पा, सांति वेल्लेने बेस्सेके मन्निकांटी.

पेन मनाकु अन्नि हीता

3 मना पिस्वर आनि बक्तिताहाटी पेन दाना ताकतताहेंदाल मनाकु बतल गावाले अव अन्नि हीता. मनम अदुन एरपाट कीताहाटी अव मनाकु दोर्कतां. अद मनाकुन दाना महिमा आनि बेसतनमहेंदाल केयता.

4 दुनियाते मनना कराब आसेनाल पुट्टना रोता गुनमताल तपिचकुंचि, मनम पेनदा बेस गुनमता हिस्सेदार्क आयाना इंचि अद मनाकु विलुवाता पोल्ले हीता.

5 अदुनहाटीं मिमेट अन्नि तीरकुना कोसिस कीम्टु गदा, विस्वासमते बेसता गुनाल्क, बेसता गुनाल्कुने तेल्वि,

6 तेल्विते सततुन आपकुनमळ, सततुन आपकुनमळते दैरनेम, दैरनेमते बक्ति.

7 बक्तिते दादल-तम्मुना कळमळ, दादल-तम्मुना कळमळते पावरम कल्पट.

8 ओक्कला इव अन्नि पोल्ले मीलोप्पो मंचि बेस्सेकि होनानयते, अव मीकुन मना सामि येसु किरिस्तुना तेल्विता बारेमते एक्को हुसार, बेस कबळलायक कीतां.

9 गानि बोनगा इव गुनाल्क हिल्लेंगो ओर गुड्डि आंदुर, लक्कुटा नदर हिल्वोर आंदुर. ओना पडाना पापालकुन पेन नोर्सि ओना सुद्दिकरन कीतदगुडा मति मर्गतोर.

10 अदुनहाटीं विस्वासुल्कुनिटा! पेन मीकुन केय्पि पेस्ता इत्ता पोल्लेतुन पक्का कियालय बस्केळ्क आतच्चोन कोसिस कीम्टु, अल्हा कीते मिमेट बस्केने विस्वासमताल अर्सि होन्निर.

11 इल्हा मिमेट मना सामि, मुक्ति हियना येसु किरिस्तुना बस्केळ्क मंदना राज्येमते वेल्ले कदरते होळिया परांतिट.

12 अदुनहाटीगे, इव पोल्ले मीक तेळियसि मनिना, मीकु दोर्कता सत्तेमते मिमेट गट्टिगा निल्सि मनिना, नना मीकु बस्केळ्क मति कीसि हीसेक मनंतन.

13 नना इद मेंदुलते मत्तच्चोरजेम मीक इवुन मति कीसि हीसि मीकुन हुसार कियमळे, बेस इनकुंतन.

14 बारित्ते, मना सामि येसु किरिस्तु नाकु हुपिस्ताप, नावा मेंदुलतुन बिराने होळसंतन इंचि नाकु एरपाट मंता.

15 अदुनहाटीं नना हासोत्तंकागुडा मिमेट इव पोल्लेन बस्केळ्क मति कियनलायक मिमेट आयगोम इंचि नना कोसिस कीसंतन.

16 बारित्ते, मना सामि येसु किरिस्तुना ताकत आनि ओना मल्सि वायाना बारेमते मोमोट मीकु वेहतस्के, तयार कीसि वेहता कतन कल्पिसि वेहा हिल्लोम. गानि मोमोट ओना पेद्र दातनमता वेलगुन कळ्कुने हळसि वेहतोम.

17 बस्के अय्ते पेनबाबानाहेंदाल कदर आनि महिमा दोर्कता, अस्के आ स्वर्गमताल, “ईर नावा पावरमगल्ला मरिं आंदुर, ईनतोनि नना आनंदमते मंतन,” इंचि उंदि अल्किर आ महिमाता वेलगुनाल केंजावाता.

18 स्वर्गमताल वाता आ अल्किरतुन केंजतस्के, मोमोट पवित्र गुट्टापोर्रो येसुनतोनि मत्तोम.

19 मनाकु पेनदा कबुरतोर पोल्लेपोर्रो एक्को बरोसा अनपिस्ता. अद पोल्ले हीकटते एलगना वेळसिलेसी दिसंता. अदुनहाटीं पंगातारिते हक्केटा सुक्का मीवा मनसुने एलगनदाका आ पोल्ले परकारम ताकते मीके बेस.

20 दर्मसास्त्रमते मत्तव पेनदा कबुरतोर पोल्लें ओरा सतता मनसुना विचारमतोनि रासतव आयों, इदुन मिमेट मुन्ने एरपाट कियमळ गावाले.

21 बारित्ते बवे बविस्वयवानि मनकना इच्छाताहेंदाल वाया हिल्लें, गानि पवित्र आत्माते निंडता लोकुल्के पेनदाहेंदाल वळकुंदुर.

2

आबद्दम कराहनोर

1 अस्के बल्हा लोकुल्कुना नड्डुम आबद्दम कबुरतोर मत्तुर, अल्हेने मीवा नड्डुमगुडा आबद्दम कराहनोर मंदानुर. नासडेम कियाना नियमकुन ओर मक्किस पीसि वांतुर आनि बोर सामि अय्ते ओर्कुन अस्तोर, ओनगुडा ओर ओप्कुन्नु. इल्हा ओरद-ओरे नासडेमतुन बिराना ओरापोर्रो तरकुंतुर.

2 वेल्ले लोकुल्क ओरा सिग्गु हिल्ला कबाह्कुन हळसि ओरालेह्केन कियानुर. ओरसंतोराहाटीगे सत्तेमता हरि बदनाम आंता.

3 आबद्दम कराहनोर, आस्तिताहाटीं तिथ्यटा पोल्लें वेह्चि मीकुन ओरा पायदाहाटीं वाळकुंतुर. ओर्क हीता सिक्साता आदेस मुन्नेटाल मंता, ओरा नासडेम कूर्कसेके हिल्ले.

4 बारित्ते, बस्के अय्ते पेनदा दूतां पापम कीतां, अस्के पेन अवुनगुडा होळसा हिल्ले. न्यायमता रोजु वायानादाका अवुन नरकमते हीकटता पोक्काने वाटसि इरता.

5 अचोने आयाका पेन एनकटा कालमता दुनियातुनगुडा होळसा हिल्ले, अद कालमते बक्ति हिल्ला लोकुल्कुना दुनियापोर्रो पेद्दा कम्मुळतुन वायागोटता. गानि सत्तेमता पोल्लें वेहता नोहानतोनि एडुरकुन पिसागोटता.

6-7 अल्हेने सदोम, गमोरा सहरकुने लोत इनानोर वरोर नीतिमंतुड मत्तोर. ओर आ सहरता दुस्ट लोकुल्कुना दुस्ट कबाह्कुनाहेंका वेल्ले दुक्कमते मनुंदुर. अदुनहाटीं पेन ओन सिक्साताल पिसागोटसि, आ सहरकुन बूळ्दि कीसि पोहता.

इल्हा बोर अय्ते बक्ति हिलाका पिसंतुर ओर्कु इसोंटा सिक्सा वांता इंचि उदाहरनलेसीं हूपिस्ता.

8 आ नीतिमंतुड ओरा नड्डुम मत्ताहाटीं ओर कियाना रोता कबाहक हळसि, ओरा पोल्लें केंजसि, ओना जीवाक रोज-रोज इरगा बादा अनपिच्चुंदु.

9 इल्हा, बक्तिगल्लोर्कुन परिकसानाल बल्हा कापाळना आनि बक्ति हिल्वोर्कुन न्यायमता रोजुनदाका सिक्साते बल्हा वाटसि इराना इत्तद सामिक तेळियसे मंता.

10 कास कीसि, बोर अय्ते पापमते अल्हेन मेंदुलता आसेता अदिकारमते मंतुर, ओर इरगा गर्रां आनि जिद्दिदेते निंडसि मत्ताहेंका स्वर्गमकु संबंदिचि मत्तोर्कुनगुडा तेराहलय वेरियुर.

11 पेनदा दूतां अय्ते ओरकन्ना एक्को ताकत, बलम मत्तव आंदुं, अयना सामिना मुन्ने ओरा बारेमते तेराहनसोंटा पोल्लें वळिकसि ओरपोर्री दोसेम दोस्सों.

12 गानि ईर ई लोक्कुल ओर्क तेळियवा पोल्लेना बारेमते तेराहसेक मनांतुर, दोर्कापीसि हळ्कानाहाटीं पुटता बुद्धि हिल्वा जिवरासिनसंतोर ईर आंदुर. अवुनालेसीं ईरगुडा नासडेम आंतुर.

13 ओरा तप्पुड कबाहकुन पीसि ओर्कु पलम दोर्कता. पोद्दला तिनुळ-उनुळ कियमळतेन वेल्लेन कुसि मंता इनकुंतुर. ओर मीवातोनि कलियसि गाटो तिननेंकेगुडा अल्हेन कीसि ओर ओरा मजां येतसेके मनंतुर. अदुनहाटीं ओर मीवा नड्डुम उंदि डाग आनि कलंक आंदुर.

14 ओरा कळ्क बोगमतनमते निंडिस मंतां. ओर पापम कियका मुन्ना पर्स्. विस्वासमते गट्टिगा हिल्वोर्कुन नळेह कीसि पापमते अरहंतुर. ओरा मनसु आस्तिक अलवट आसि मंता. ओर सापनेमते मत्तोर मर्क आंदुर,

15 ओर सवरटा हरदाल तप्पोत्तोर आंदुर, बोअरना मर्रि बिलाम इननोना हर्रि पीतुर. बिलामुं कु कराब कबाहकुना कूलि पसंद मत्ता.

16 गानि ओर कीता कराब कबाहकुनाहाटीं ओनकु तेळियागोट्सि वेहमळ जर्गता. वळ्का वायवा उंदि गाडदि मनकना लेंगुने आ पेनदा कबुरतोना मुर्कतनमतुन आपता.

17 ओर एर हिल्वा कुहिं आनि दुमारम तेहकुंचि ओयाना मब्बु तेर्पे आंदुर. ओराहाटीं बस्केळ्क हीकट मनना उंदि जेगा तयार कीसि मंता.

18 ओर बत्तक ओज्जुवा पोंगुळ पोल्लें वळ्कसेके मनंतुर, तप्पुड हर्रि ताकानोरवेटाल तपिचकुंचि इंदके-इंदकेने बेसता हर्दे वातोर्कुन, ओर ओरा मेंदुलता

रोता आसेना हेंदाल बोगमतनमते अरहंतुर.

19 ओर कुद्दे कराब कबाहकुना दासुल्क आसि, इंकावरोन असोंटा गतिताल तेंडांतोम इंचि पोल्ले हीतुर. बारित्ते वरोर मनकन बतलय्ते गेलसंतोरो, ओर अदुना दासुड आसि मनंतोर.

20 ओरगिंटा मना सामि मुक्ति हियना येसु किरिस्तुना तेल्विता हेंदाल दुनियाता कराब कबाहकुनाल पलाते अरतंका, मर्मा अवे कराब कबाहकुने हिरकिसि अवुना लोप्पोने ताकते, ओना गति मुन्नेटा गतिकन्ना आकिरता गति वेल्ले कराब मनंता.

21 बारित्ते ओर सत्तेमता हरदुन एरपाट कीसि, ओर्क हीता पवित्र आदेसताल ताप्सि होनमळकन्ना, अद हर्रि ओर्कु तेळियका मनमळे बेस मत्ता.

22 इद ओरा बारेमते, “नय अद कक्कुतदुन तिनालय मर्मा मल्लंता, बेस नोरता पद्दि मर्मा बुदातेन पोर्लता,” इनना निजम सात्रम परकारम जर्गता.

3

येसु मर्मा वांतोर

1 पावरमगल्लोरिता! इद रोंडो सिट्टि नना मीक रासतन. इव रोंडु सिट्टिने मीवा पवित्र मनसुन जेगर्तते इर्गट इंचि नना मति कीसि हीतन.

2 अदुनहाटी मिमेट पवित्र पेनदा कबुरतोर मुन्नेने वेहचि मत्ता पोल्लेन अल्हेने प्रेरितुल्कुना हेंदाल वेहतव सामि आनि मुक्ति हियानोना आदेसकुन मति इर्गगोम.

3 आकिर रोजकुने मीकुन कारेड्डाल्क कियानोर वायानुर, वासि ओर ओरा कराब इच्छाना परकारम ताकानुर, इद पोल्ले मीक मुन्ने तेळियमळ गावाले.

4 इंका ओर वासि, “ओर मर्मा वांतोर इंचि हीता पोल्ले बतल आता? मावा एनकटा पेद्दाल्क अय्ते हासोत्तुर, दुनिया पुटतस्केटाल अन्नि पोल्लें बल्हा मत्तव अल्हे मंतां,” इंचि मीकुन पूसकीतुर.

5 इंका ओर, वेल्लेन वर्सा मुन्ने पेन दाना पोल्लेतोनि बूमितुन, मब्बुन एताल पुटिस्ता. पुट्टिचि एतुन वेंरे कीसि निल्हाता, इद पोल्ले ओर्क तेळियसिगुडा मति मरंगतुर.

6 अद कालमता दुनिया कम्मुळते मुळगिसि एताहेंदाले नासडेम आता.

7 गानि इंदके मनना मब्बु, बूमितुन, अदे पोल्लेते तळमितोनि नासडेम कियाना रोजुनदाका कापाळसि इरसेक मंता. बक्ति हिल्वोरा न्यायम नासडेम आयाना रोजुनदाका अल्हेन मनंता.

8 गानि पावरमगल्लोरिता! सामिनगा उंदि रोजु वेय वर्सानालेसीं आनि वेय वर्सां उंदि रोजुनलेसीं मनंतां इद पोल्लेतुन मति मर्गमटु.

9 सामि हीता पोल्ले पूरा कियालय ओर आल्सेम कीसेक मंतोर इंचि इच्चुर इंतुर, ओर अल्हा आल्सेम कीसेक हिल्लोर. गानि बोरें मनकल नासडेम आयाकॉटा, अंटोर्क ओरा मनसु मार्सकुनना मोका दोर्कना इंचि मीवा बारेमते ओर्सुकुंचेके मंतोर.

10 गानि सामि मल्लिस वायाना रोजु दोंगानलेसीं वांता. अस्के मब्बु पेद्रु दा आवाजतोनि दिसाकॉटा आंता. मब्बुने मनानव अन्नि तळमिते कर्गिस दांतां आनि बूमि, बूमिपोरों मत्तव अन्नि वेसि दांतां.

11 इवन्नि नासडेम आयाना मंता, अदुनहाटीं मिमेट पवित्र अल्हेन पेनदा पिस्वरते बल्हा मंदगोम, विचारम कीम्टु.

12 पेन वायाना रोजुनाहाटीं मिमेट एदुर हळसेक मंतिर, अद बिराना वायाना इंचि कोरसेके मंटु. अद रोजु मब्बु तळमिते वेसि नासडेम आंता आनि अवुने मत्तव अन्नि बारे तळमि दगडाकु कर्गिस दांतां.

13 गानि पेन हीता पोल्ले परकारम मनम पूना मब्बु, पूना बूमिताहाटीं एदुर हळसेक मंतोम. अगा सत्तेमे निल्लिस मनंता.

14 अदुनहाटीं पावरमगल्लोरिता, मिमेट इवुनाहाटीं एदुर हळसेक मंतिट, अय्ते पेनदा मुन्ने सांतिते, डाग हिलाकॉटा, दोसेम हिलाकॉटा मनालय कोसिस कीम्टु.

15 मना सामिना ओप्के पीसि मनमळ मना मुक्तिहाटीगे इंचि इनकुंटु. सामि हीता बुद्दिद परकारमे मना पावरमगल्ला पौलुस दादल मीक इव पोल्लें रासतोर.

16 इवुना बारेमते ओर ओना अन्नि सिट्टिने रासतोर. गानि अब्बेटाल इच्चुं पोल्लें तेळियालय वेल्लेन कस्टम मंतां. करियवोर, उंदि पोल्लेते निल्लिस मनवोर, वोरें दर्मसास्त्रमते मत्ता पोल्लेन कीताप इवुनगुडा कींतुर. अल्हा कीसि ओरा नासडेमतुन ओरें तरकुंतुर.

17 अदुनहाटीं पावरमगल्लोरिता! मीक इव पोल्लें मुन्नेटाले एरपाट मंतां, नीति हिल्ला लोकुल्लुना तप्पुकुने हिरकिसि, मीवा गट्टिगा निल्लिस मत्ता हरदाल तप्पिसि होनाकॉटा हुसारते मंटु.

18 मना सामि मुक्ति हियना येसु किरिस्तुना कुर्पाति, तेल्विते मिमेट बेस्सेके होंटु. इंदके बस्केळक ओन्के पेद्रु दातनम दोर्किकांटी, आमीन.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068